

1 **La maula\***

2 Cura che jeu sun arrivaus a casa ed hai mess las clavs-casa en la giacca, hai jeu realisau  
3 cun trer ora il maun ch'enzatgei nunusitau sesanflava giudem il sac. Cun palpar pli afuns hai  
4 jeu tuccau enzatgei lom. Senza studegiar pli bia hai jeu empruau da piclar ora la caussa cul  
5 det-mussader e cul polisch. Jeu sun vegnius da tschappar e trer ora.

6 Mo strusch che jeu hai viu tgei che quei era hai jeu survegniu disgust ed hai schau curdar  
7 quei sin meisa. Ei era ina enorma maula brina. Mo jeu hai buca giu peda da studegiar co  
8 quei animal haveva fatg d'arrivar en mia tastga. Sin meisa era in pign pachet. La meraviglia  
9 tentava mei da mirar tgei che sesanfli lien. Jeu sun ius per in cunti, hai tagliau las cordas e  
10 cun arver igl uvierchel hai jeu aunc inagada fatg in segl: Giufuns la scatla seruschnava  
11 in'otra maula. Mo quella era nera ed haveva gronds tachels mellens sil dies.

12 Jeu hai entschiet a ponderar: Sche jeu survegnel in pachet, dat ei era enzatgi che ha  
13 tarmess a mi enzatgei e sch'enzatgi vul tarmetter enzatgei a mi, vegn quella persuna era ad  
14 haver giu ses motivs e la maula stueva lura era haver ina certa impurtonza.

15 Jeu hai svidau la scatla sin meisa ed hai entschiet a contemplar ils dus animals pli datier. E  
16 lu hai jeu viu ch'els eran atgnamein gnanc aschi disgustus e macorts sco ei pareva a mi  
17 all'entschatta. Els havevan omisdus ina pial glischonta cun musters en biaras colurs ed ord  
18 las plattettas glischontas che formavan ensemen in cuirass gagl, carscheva ina sort fol. Ei  
19 fageva queida da strihar suravi cun la detta.

20 Ussa vegnev'ei buca pli en damonda da better naven ils dus animals, sco quei che jeu level  
21 atgnamein far all'entschatta. Avon in pign mument era quei dus objects disgustus che  
22 svegliavan en mei negins auters giavischs che mo quel da sedeliberar dad els aschi spert  
23 sco pusseivel. Mo uss era quei tut anetg duas creatiras ch'enzatgi haveva priu naven da lur  
24 ambient natural. Ei dependeva da mei, sch'ellas massen alla malura ni sch'ellas vivessen  
25 vinavon. Surschar ellas a lur destin havess pariu donn a mi, e cun quei sesentivel jeu era  
26 gia responsabels per ellas: Ellas stuevan haver enzatgei da magliar. Mo – ferton che jeu  
27 contemplavel ellas, ein buca mo mes sentiments da responsablidad carschi, ellas sezzas  
28 ein carschidas!

29 Mintgin sa che sch'ins mira ina caussa pli datier, para ella bia pli gronda che sch'ins  
30 contempla ella dalunsch. Aschia era quei era cun las maulas. Cura che jeu erel circa cul nas  
31 sissu, parevan ellas a mi prest aschi grondas sco in gat cura ch'ins stat sin peis e mira giu  
32 sin el. Ed ussa ch'jeu stavel en pei avon la meisa, eran las maulas aunc adina tuttina  
33 grondas sco avon sin meisa. Ellas eran carschidas en quei mument che jeu sun sesalzaus.  
34 Ellas sesturschevan e seruschnavan per la meisa entuorn smaccond ora certas ramurs  
35 raucas sco quei che jeu havevel aunc mai udiu. Quella culs tachels mellens fageva in  
36 miaulem penetront bunamein sco in gat, mo pli cuort e pli stgir. L'otra udev'ins buc aschi  
37 bein, ina runcada da temps en temps, mintgagada ch'ella stendeva il tgierp e scuflava puspei  
38 el.

39 Mo co far da perver quels dus feghers? Ton savevel jeu che las maulas maglien jarva e  
40 feglia, mo quellas duas fagevan buca la pareta dad animals che secuntentan cun quei che  
41 crescha giu per tiara. Per quietar quels schanis selvadis deva ei mo ina caussa: carn!

42 Igl ei vegniu endamen a mi ch'ins metteva leu, nua che jeu stavel, adina traplas da miurs giu  
43 en tschaler. Pia, las maulas eran grondas sco gats, ils gats maglian miurs e sche las maulas  
44 duvravan carn, er'ei da mirar, sch'ei havessi miurs ellas traplas. Jeu sun ius giu en tschaler  
45 ed en ina trapla per miurs vivas era bein en ina. Jeu hai pigliau e purtau ella si als dus  
46 feghers.

47 Las maulas eran denton rucladas giud meisa ed havevan entschiet a far in viers stermentus,  
48 strusch ch'ellas havevan realisau che jeu vegni neutier cun enzatgei per emplenir lur venters.  
49 Mo probablamein havess ei buca gidau bia da dar vi ad ellas la miur mo aschia. Las maulas  
50 fussen stadas memia plaunas da pigliar ella. Aschia ei buca restau a mi bia auter che da sez  
51 sturnir ella e da procurar ch'ellas survegnien la carn. Cun pial e tut hai jeu era buc ughegiau

52 da dar, per esser segirs ch'ellas sestraunglien buc ni ch'ellas tschaffien si enzatgei  
53 nuscheivel. Il cunti che jeu havevel duvrau per tagliar la corda dil pachet era aunc sin meisa.  
54 Jeu hai priu el en miu maun dretg, la miur el seniester, e ...

55 Ussa havess la mezca duiu entscheiver. Mo lu hai jeu pér realisau endretg che quei animal  
56 stargeva e deva combas en mes mauns, cun quei peil fin encunter mia pial ed jeu sun  
57 sefermaus. Las maulas han buca fatg paus, la melna serendeva gia dalla vestgadira si ed  
58 jeu hai stuiiu dar ina dètga calzerada cun la comba per better ella puspei giun plaun. Ussa  
59 gidava nuot auter pli. Jeu hai mess il tagliom vid la gula, hai serrau ils egls e fatg in tagl. Per  
60 in mument erel jeu sco paralisaus. Lu hai jeu mirau giu sin la miur.

61 Ei deva negina plaga, mo dretg e seniester culavan ora daguots da saung, giu sil maun e  
62 giun plaun, nua che las maulas ein sebessas enguordamein sissu fagend ina rueida  
63 sgarscheivla.

64 Jeu fixavel aunc adina igl animal en miu maun. Tut anetg ha el fatg in moviment cun  
65 omisduas combas davos. Jeu hai serrau la detta entuorn il buttatsch ed hai realisau che quel  
66 sescuflava aunc adina regularmein. In patratg ei ius tras il tgau a mi e lu ha ei pariu a mi che  
67 tut massi bia pli plaun. Jeu hai schau dar il cunti. Ils mauns tremblavan. Mo jeu stuevel finir  
68 quei che jeu havevel entschiet. Jeu hai puspei priu si il cunti ed empruau da far in tagl. Mo ils  
69 mauns fagevan buca pli per camond. Jeu hai mo pli viu a curdond tut giun plaun. Lu eis ei  
70 vegniu stgir avon mes egls, la schanuglia ha dau suenter ed jeu hai giu il sentiment sco sche  
71 jeu curdass da leu vi.

72 Con ditg che jeu sun staus naven sai jeu buc. Cura che jeu erel puspei tier memez, sesevel  
73 jeu sin ina sutga senza pusal, cul dies encunter la preit ed ils mauns viults anora sin la  
74 schanuglia. Els eran buca cotschens dil saung sco jeu havess spitgau.

75 Jeu sun staus si ed hai mirau entuorn. Giun plaun, sper in pei dalla meisa, era in cunti. Sin  
76 meisa era ina scatla vita derschida ed in toc naven da quella igl uvierchel cun in pèr cuas da  
77 pachet. Quei era tut.

*(tenor Paulin Nuotclà)*

*\*maula, gatta*